



Komunikadu Imprensa
Tribunál Judisál Primeira Instância Dili
21 Jullu 2025

**Tribunál absolve membru PNTL na'in tolu ne'ebé envolve iha krime sekuestro:
JSMP husu ba Prokuradór atu halo rekursu**

Iha 16 Jullu 2025, Tribunál Judisál Primeira Instância Dili, prezide julgamentu leitura akordaun hodi absolve arguidu na'in tolu hanesan membru PNTL hosi krime sekuestro, ne'ebé envolve arguidu AAM, TV no TJP hasoru ofendidu JBdJS iha Munisípiu Dili, tanba konsidera laiha prova sufisiénte.

“JSMP dezafia Prokuradór no asistente sira atu halo rekursu hasoru desizaun tribunál nian ba kazu ne'e tanba iha faktu balun ne'ebé JSMP nota no konsidera katak tribunál la adekuadamente halo avaliasaun profunda no analiza klean ba prova sira nune'e rezulta absolvisan ba arguidu sira”, dehan Sr. Casimiro dos Santos, Diretór Interinu JSMP.

Prokuradór akuza katak iha 31 Setembru 2022, arguidu AAM hanesan membru polísia investigadór iha Eskuadra PNTL Vera-kruz nian simu informasaun hosi denunsiantes VdS, ne'ebé mak informa katak nia alin ho naran GFdS hetan baku iha loron 01 Setembru 2022, iha oras tuku 04:00 madrugada. Denunsiantes nia alin ne'e baixa hela iha Ospital Nasionál Guidu Valadares. Hafoin simu tiha informasaun ne'e, arguidu AAM ho TdCPE dezloka keda ba Óspital Nasionál Guidu Valadares ho objetivu atu rekolla informasaun hosi GdS, maibé arguidu AAM arguidu TdCPE la konsegu fote informasaun hosi GdS tanba iha hela sala operasaun.

Bainhira fila hosi Óspital Nasionál Guidu Valadares, arguidu AAM kontinua rekolla informasaun ba testemuña VdS. Hosi informasaun sira ne'ebé halibur, identifika katak ofendidu JBdJS ho nia kolega sira mak halo agresan fízika hasoru GFdS ho nune'e arguidu AAM hamutuk ho arguidu TdCPE, inklui membru PNTL balun, desloka imediata ba iha Aldeia 01, Suku Kaikoli, Postu Administrativu Vera-Cruz, Munisípiu Dili, hodi halo identifikaun ba ofendidu JBdJS ho nia kolega na'in rua ho inisial PM ho OdCC.

Arguidu AAM ho arguidu TdCPE halo detensaun ba ofendidu JBdJS ho nia kolega PM no OdCC ho objetivu hodi halo identifikaun iha oras 12 nia laran iha Eskuadra PNTL, Postu Administrativu Vera-Kruz nian.

Hafoin hala'o tiha identifikaun iha oras 12 nia laran, arguidu sira liberta tiha ofendidu nia kolega PM ho OdCC, enkuantu ofendidu JBdJS arguidu sira kontinua asegu nia iha Eskuadra PNTL Vera-Kruz. Medida ne'ebé arguidu sira fote sein komunika no informa ba komandante investigasaun kriminál Munisípiu Dili nian no la informa ba seksaun justisa PNTL Munisípiu Dili nian. Bainhira arguidu TdCPE, lori ofendidu ba komandu PNTL Munisípiu Dili, ofendidu nia inan RdJS mak akompaña ba no kuandu to'o iha edifisio komandu PNTL Munisípiu Dili, arguidu TdCPE entrega

imediata ofendidu ba arguidu TV hodi hatama ba iha sela detensaun sem konfirma ba komandante investigasaun Munisípiu Dili nian.

Durante iha sela detensaun, arguidu TV mak tau matan ba ofendidu no la autorizá kualker família sira hodi ba hare'e ka vizita no bainhira ofendidu nia bin FEdC tenta hodi hakbesik ba atu ko'alia ho ofendidu arguidu TV ho lian maka'as hakilar dehan "ne'e la'os imi nia uma ka merkadu," nune'e ofendidu nia bin la konsege ko'alia ho ofendidu.

Katak iha oras 18:00, kuandu ofendidu nia inan RdJS lori hahan ba atu fó ba ofendidu, ofendidu hakarak han iha koridor sala detensaun nian, maibé arguidu TV la aseita no haruka ofendidu han deit iha sela detensaun nian. Mezmu nune'e, ofendidu dehan ba arguidu TV katak "ha'u hakarak han iha ne'e, atu haree ha'u nia inan".

Tanba ta'uk, hafoin han ofendidu tama fali ba sela detensaun nian ho tristeza no oin nakukun no dehan ba nia inan katak "ha'u ta'uk." Maibé nia inan kontinua fó korajen katak "ó labele ta'uk tanba símbolu iha sira-nia kabaas ne'e simboliza sira sei kuidadu ó". Hafoin ko'alia nune'e, ofendidu nia inan mós sai hosi fatin refere.

Família ofendidu hatene ofendidu mate ho kondisaun tara-aan iha sela laran, bainhira iha oras tuku 19:00 kalan, ofendidu nia tiun hakarak ba vizita ofendidu iha sela detensaun. Iha altura ne'ebá ofendidu nia tiun husu ba membru PNTL ida ne'ebé mak nia la konsege identifika nia naran "katak ha'u atu hare'e ha'u nia subriñu", maibé membru PNTL refere ko'alia ho lian neneik ba ofendidu nia tiun katak nia subriñu mate tiha ona.

Haktuir dokumentu sira identifikasaun iha fls.317-320, arguidu AAM hala'o ona identifikasaun ba ofendidu JBdJS nu'udar suspeitu ba prosesu ho Nú.0185/22.DILDIL iha 01 Setembru 2022, iha oras tuku 12:00 meiodia. Tuir regra prosesuál penál nian katak bainhira remata identifikasaun tenke liberta imediata suspeitu no remete relatóriu ka auto notisia ba Ministériu Públiku hodi husu mandadu detensaun fora hosi flagrante delitu kuandu iha nesesáriu ka situasaun urjente. Mezmu nune'e, arguidu sira hafoin halo identifikasaun durante oras 12:00 nia laran, kontinua asegura ofendidu iha sela detensaun nian no viola regra sira hosi Kódigu Prosesu Penál art. 53 KPP, no tuir regra detensaun sira ho karáktar hanesan ne'e tenke komunika imediata ba prokuradór maibé ida ne'e la akontese.

Ho arguidu sira nia hahalok ne'e, prokuradór akuza arguidu sira nu'udar ko-autór pratika krime sekuestro tuir artigu 160 nú 2 (c) KP ho moldura penál tinan 2 to'o tinan 8 prizaun.

Hafoin halo avaliasaun ba faktu sira hotu, tribunál la prova katak arguidu sira detein ofendidu iha sala detensaun tanba iha altura ne'e arguidu sira asegura ofendidu iha koridor besik sala detensaun nian. Tribunál mós la prova katak arguidu sira pratika krime sukuestro tanba hafoin halo identifikasaun, arguidu livre ba-mai iha koridor laran besik sala detensaun nian.

Bazeia ba faktu la provadu sira ne'e no tetu mós ho sirkunstánsai hotu-hotu ne'ebé haleu krime ne'e, nune'e tribunál konklui prosesu ne'e hodi absolve arguidu sira hosi krime ne'e.

Tuir JSMP nia haree, juis sira nia entendimentu iha kazu ne'e katak atu priense elementu krime sekuestru tenke detein no mantein ofendidu iha sala detensaun ka prizaun, enkuantu iha kazu ne'e tanba ofendidu livre la'o ba-mai iha koridor besik sala detensaun nian, lakonsidera nu'udar detensaun. Juis sira la avalia no aprofunda katak odamatan (portaun) refere xave metin no bainhira ofendidu nia bin atu aprosima no ba ko'alia ho ofendidu, arguidu TV ho lian maka'as bandu ofendidu nia bin atu labele ko'alia ho ofendidu.

Durante produsaun ba prova, JSMP mós nota katak iha inspesaun ba lokal krime mezmú arguidu sira deklara katak ofendidu iha hela koridor besik sala detensaun nian maibé koridor refere iha ninia odamatan/portaun no iha altura ne'ebá ofendidu iha koridor laran no portaun hosi koridor refere taka metin nune'e ofendidu la bele livre atu sai ba-mai.

Iha artigu 162 KP kona-ba krime sekuestru nian katak; 1. Se maka iha situasaun la tama iha lei prosesuál penál nia previzaun detein, prende, mantein iha prizaun ka detensaun ema seluk ka **oin naran ida**, hasai ema nia liberdade sei hetan pena prizaun to'o tinan 3 ka multa.

Iha número 2 haktuir katak sei aplika pena prizaun tinan 2 to'o tinan 8 kuandu:

- a. Privasaun ba liberdade ne'e kleur liu oras 72.
- b. Ajente pratika privazaun ne'e ho ofensa ba integridade fízika, tortura ka tratamentu seluk kruel, degradante ka desumanu.
- c. Privasaun ne'e halo vítima mate tanba ajente nia neglijensia ka halo vítima oho-an.
- d. Ajente halo privasaun ne'e ba ema ne'ebé ezerse autoridade públiku, relizioja ka Politika.
- e. Aurtoridade nia ajente ka organizaun politika nia membru maka promove, autoriza ka apoiaprivasaun ne'e.

Elementu esensial hosi krime sukuestru maka; ema ne'ebé la tama iha situasaun lei prosesuál penál ninian detein, prende no mantein ka oin naran ida ba ema seluk nune'e ema refere lakon nia liberdade.

JSMP fiar katak ofendidu iha presaun tanba lakon nia liverdade no iha presaun psikolojiku maka'as nia laran tanba la iha mekanizmu komunikaun ida ne'ebé apropiadu, klaru no amigavel, nune'e nia deside tara-an. Iha kazu normal, la iha lojiku bainhira ema ida ho situsaun normál/la sofre moras ka presaun ruma imposivel foti desizaun atu oho-an/tara-an bainhira laiha presaun psikika ka hahalok/tratamentu dezumanu ruma ne'ebé nia sofre. Iha kazu ne'e arguidu sira lori ofendidu ho nia kolega na'in rua inisial PM ho OdCC ba halo identifikasaun iha Eskuadra Polisia Vera-Cruz nian no hafoin halo identifikasaun ba ofendidu ho nia kolega nain rua seluk refere iha leten, arguidu sira imediata liberta ofendidu nia kolega na'in rua (PM ho OdCC) refer, entretantu ba ofendidu arguidu sira kontinua aseguira iha koridor besik sala detensaun nian no xave metin portaun nune'e

ofendidu la bele sai ba liur hodi hasoru nia família sira. Faktu ida ne'e komprova ho deklarasaun testemuña FEdC no RdJS nu'udar ofendidu nia inan no bin ne'ebé deklarata katak portaun koridor refere xave metin nune'e bainhira testemuña FedC atu fo sigaru ba ofendidu maibé la konsege no entrega deit ba polisia sira atu fó ba ofendidu. Alende ne'e komprova mós ho rezultadu inspesaun ba lokal krime ne'ebé deskobre katak altura ne'ebá portaun koridor refere xave metin.

JSMP konsidera katak iha duni limitasaun ba ofendidu nia liberdade tanba ofendidu la bele sai ba hasoru nia família inklui atu ko'alia ho nia bin FedC. Faktu ne'e komprova ho deklarasaun testemuña FEdC (ofendidu nia bin) nian katak bainhira nia hakbesik ba ofendidu atu ko'alia, arguidu TV ho lian maka'as hakilar dehan, "ne'e la'os imi nia uma ou merkadu" nune'e ofendidu nia bin la konsege ko'alia ho ofendidu.

Ho prova sira ne'ebé iha, JSMP rekomenda ba iha prokuradór no asistente sira atu halo rekursu hasoru desizaun tribunál primeira instánsia nian ne'e iha prazu legal kuandu simu ona notifikasaun ba desizaun tanba iha indikasaun katak desizaun ne'e la justu.

Kazu ne'e rejista iha tribunál ho Nú. Prosesu: 0353/22.PCCIC, Julgamentu leitura akordaun ne'e Prezide hosi juis kolektivu ne'ebe representa hosi Dr. Jose Antonio de Jesus Escorial, Ministeriu Públiku representa hosi Dr. Aderito Tilman no akompaña hosi asistente sira hosi JUS Dr. Olivio Afonso Barros no Dra. Adelina Lobo. Entretantu arguidu sira hetan defeza hosi Dr. Eustaque S.P. Guterres no Dr. Humberto Alves hosi Defensória Públiku.

Atu hetan informasaun klaru liutan favór kontaktu:

Casimiro dos Santos
Diretór Interinu JSMP
Telefone: 3323883/77257466
Diresaun e-mail:santos.cas76@gmail.com
info@jsmp.tl
Website: <http://jsmp.tl>